

საქართველოს პროფესიონალ ბუღალტერთა და აუდიტორთა ფედერაციის (ბაფი)

2016 წლის საქმიანობის ანგარიში

მოკლე ორგანიზაციული მიმოხილვა

ბაფი არის წევრობაზე დაფუძნებული პროფესიული (არაკომერციული, არასამეწარმეო) ორგანიზაცია, რომელიც საქმიანობას ახორციელებს სათავო ოფისის (თბილისი), რეგიონალური და რაიონული განყოფილებების (ფილიალების) მეშვეობით. მართვის უმაღლესი ორგანოა წევრთა საერთო კრება, პოლიტიკასა და სტრატეგიულ სამოქმედო გეგმას განსაზღვრავს ბაფის გამგეობა, რომლის მართვასა და განხორციელებაზე პასუხისმგებელია აღმასრულებელი დირექცია. 2016 წლის 31 დეკემბრის მონაცემებით ბაფის წევრია: 6,770 ფიზიკური პირი ბუღალტერი და აუდიტორი (მათ შორის 421 ნამდვილი წევრი, ხოლო 6,350 ასოცირებული წევრი); 98 აუდიტორული კომპანია (კორპორაციული წევრები). ბაფი ბუღალტერთა საერთაშორისო ფედერაციის (IFAC) წევრია 2000 წლიდან.

ბაფის წესდებით განსაზღვრული მისია არის - ბიზნესის განვითარების მხარდაჭერა, საინვესტიციო ბიზნესგარემოს გაუმჯობესების ხელშეწყობის გზით, რომელიც გულისხმობს:

- საქართველოს კერძო სექტორში ბუღალტრული აღრიცხვისა და აუდიტის საუკეთესო საერთაშორისო პრაქტიკის დანერგვისათვის ხელსაყრელი გარემოს შექმნას;
- აუდიტორებისა და ბიზნესში დასაქმებული ბუღალტრების მაღალკვალიფიციური დონის მიღწევას, საზოგადოებისათვის ხარისხიანი მომსახურების უზრუნველყოფის მიზნით;

მისიიდან გამომდინარე, ბაფის საქმიანობის ძირითადი მიმართულებებია:

ა. ბუღალტრული აღრიცხვისა და აუდიტის სფეროში საერთაშორისო პრაქტიკის დასამკვიდრებლად, რეფორმებში აქტიური მონაწილეობა და პროფესიის მარეგულირებელი საკანონმდებლო ბაზის ლობირება. პროფესიული სერტიფიცირების საერთაშორისოდ აღიარებული ლიტერატურის, ფინანსური აღრიცხვისა და აუდიტის საერთაშორისო სტანდარტების თარგმნა და გამოცემა;

ბ. ორგანიზაციის წევრების საკონსულტაციო მომსახურება, პროფესიული სერტიფიცირება, კვალიფიკაციისა და მომსახურების ხარისხის ამაღლება და მათი ინტერესების დაცვა;

გ. პროფესიასთან დაკავშირებული ეკონომიკური საქმიანობა, ფინანსური დამოუკიდებლობის შენარჩუნებისათვის.

ბაფი დაარსების დღიდან აქტიურად თანამშრომლობს ბუღალტრული აღრიცხვისა და აუდიტის სფეროსთან დაკავშირებულ საერთაშორისო ორგანიზაციებთან, საქართველოს სამთავრობო და არასამთავრობო სტრუქტურებთან, აკადემიურ სექტორთან და გაფორმებული აქვს შესაბამისი მემორანდუმები. ბაფის ძირითადი პარტნიორებია:

- ბუღალტერთა საერთაშორისო ფედერაცია (IFAC)

- სერტიფიცირებულ ნაფიც ბუღალტერთა ასოციაცია (ACCA)

BPP Learning Media – საგამომცემლო დაწესებულება

- ფინანსური ანგარიშგების საერთაშორისო სტანდარტების საბჭო
- აშშ საერთაშორისო განვითარების სააგენტო
- მსოფლიო ბანკის "ფინანსური ანგარიშგების რეფორმის ცენტრი"
- სახელმწიფო აუდიტის სამსახური
- სსიპ - საჯარო აუდიტის ინსტიტუტი
- შემოსავლების სამსახური
- ივანე ჯავახიშვილის სახელობის თბილისის სახელმწიფო უნივერსიტეტი
- პროფესიონალ ბუღალტერთა ინსტიტუტი
- შავი ზღვის საერთაშორისო უნივერსიტეტი
- სოხუმის სახელმწიფო უნივერსიტეტი
- ახალციხის სახელმწიფო სასწავლო უნივერსიტეტი და სხვ.

ბაფი საქმიანობას ახორციელებს გამგეობის, აღმასრულებელი დირექტორისა და შესაბამისი კომიტეტების მიერ შემუშავებული და დამტკიცებული შიდა პოლიტიკის, სისტემებისა და მენეჯერული პროცედურების საფუძველზე, რომლებიც უზრუნველყოფს:

- ა) პროფესიული სერტიფიცირებისა და განგრძობითი განათლების მიმართ მოთხოვნების დაკმაყოფილებას;
- ბ) პროფესიული ორგანიზაციების წევრების მიერ პროფესიონალი ბუღალტრების ეთიკის კოდექსისა (IESBA Code) და ხარისხის კონტროლის სისტემის მიმართ მოთხოვნების შესრულებას;
- გ) სამეურნეო-საფინანსო საქმიანობის ეფექტურ მართვას.

საანგარიშო პერიოდამდე (1996-2015 წლები) საქმიანობის შედეგების რეზიუმე

ბაფის ინიციატივითა და უშუალო მონაწილეობით:

- ბუღალტრული აღრიცხვისა და აუდიტის საერთაშორისო სტანდარტები აღიარებულ იქნა საქართველოს ეროვნულ სტანდარტებად;
- მიღებულ იქნა საქართველოს კანონები: ბუღალტრული აღრიცხვისა და ანგარიშგების რეგულირების შესახებ (1999) და ბუღალტრული აღრიცხვისა და ფინანსური ანგარიშგების აუდიტის შესახებ (2012);
- დამკვიდრდა პროფესიული თვითრეგულირების პრინციპები;
- დაფუძნდა პროფესიონალ ბუღალტერთა ინსტიტუტი და ყოველთვიური სამეცნიერო – პრაქტიკული ჟურნალი ბუღალტრებისათვის;
- ჩამოყალიბდა სპეციალისტთა გადამზადების, პროფესიული სერტიფიცირებისა და განგრძობითი სწავლების სისტემა;
- განხორციელდა პროფესიული სერტიფიცირების საერთაშორისოდ აღიარებული პროგრამის (ACCA) ქართულ ენაზე ადაპტირება, პოპულარიზაცია და აღიარება ACCA-ის მიერ. 2003 წლიდან დღემდე არის საქართველოში ACCA-ის პროგრამების წარმმართველი;

- შეიქმნა მომსახურების ხარისხის კონტროლის სისტემის შემოწმების ნორმატიული ბაზა და განხორციელდა მისი პრაქტიკაში დანერგვა;
- ითარგმნება და გამოიცემა ფინანსური ანგარიშგებისა და აუდიტის საერთაშორისო სტანდარტები. მზადდება და გამოიცემა მათი პრაქტიკაში გამოყენებისათვის საჭირო ლიტერატურა;
- დაარსების დღიდან ბაფი ახორციელებს პროფესიის მარეგულირებელი საკანონმდებლო ნორმატიული ბაზის ლობირებას;
- ჩატარდა 12 საერთაშორისო კონფერენცია პროფესიის რეგულირების, პროფესიული სერტიფიცირების, მომსახურების ხარისხის კონტროლის თემებზე.

საანგარიშო (2016 წელი) პერიოდის საქმიანობა

1. წევრთა საერთო კრება

2016 წლის 21 მაისს “ქორთიარდ მარიოტში” გაიმართა ბაფის საერთო (21-ე) კრება. კრებას 211 მოწვეული დელეგატიდან ესწრებოდა 157 (კვორუმი 106 დელეგატი).

ბაფის გამგეობის საქმიანობის შესახებ ანგარიში წარმოადგინა გამგეობის თავმჯდომარემ, ბატონმა **ზურაბ ლალაზაშვილმა**. საერთო კრებამ კენჭისყრით შეაფასა საანგარიშგებო პერიოდში ბაფის გამგეობის საქმიანობა. კენჭისყრის შედეგები: დადებითი შეფასება - 157 დელეგატი, წინააღმდეგი - 0; თავი შეიკავა - 0.

ბაფის საქმიანობის შემოწმების შედეგებზე საერთო კრებას ანგარიში წარუდგინა სარევიზიო კომისიამ, რომელმაც დადებითი შეფასება მისცა ბაფის 2016 წლის 20 მაისამდე პერიოდის საქმიანობას.

საერთო კრებას ბაფის 2015 წლის ფინანსური ანგარიშგების აუდიტის შედეგები გააცნო მოწვეულმა აუდიტორმა. წარმოდგენილი ანგარიშგების გაცნობის შემდეგ, საერთო კრებამ კენჭი უყარა და დადებითად შეაფასა საანგარიშგებო პერიოდის ბაფის საქმიანობა: დადებითი შეფასება - 156 დელეგატი, წინააღმდეგი - 0; თავი შეიკავა - 1.

საქმიანობის შესახებ ანგარიშგების მოსმენისა და დამტკიცების შემდეგ, ბაფის 20 - წლიან საქმიანობაში შეტანილი განსაკუთრებული წვლილისათვის საპატიო სიგელებით დაჯილდოვდნენ:

1. **ბაბალე ალავერდაშვილი** - ბუღალტრული აღრიცხვისა და აუდიტის საერთაშორისო სტანდარტების ქართულ ენაზე თარგმნისა და მათი პრაქტიკაში დამკვიდრების სფეროში შეტანილი წვლილისათვის;
2. **მარინა რევაზიშვილი** - ბრიტანეთის ნაფიც სერტიფიცირებულ ბუღალტერთა ასოციაციის (ACCA) ადაპტირებული ქართულენოვანი პროგრამის პოპულარიზაციაში შეტანილი წვლილისათვის;

3. **მარიამ წიკლაშვილი** - საქართველოში ბუღალტრული აღრიცხვის საერთაშორისო სტანდარტებით კადრების გადამზადების სფეროში შეტანილი წვლილისათვის;
4. **მარინა მჭედლიშვილი** - საქართველოში ბუღალტრული აღრიცხვის საერთაშორისო სტანდარტებით კადრების გადამზადების სფეროში შეტანილი წვლილისათვის;
5. **ეკატერინე წამალაშვილი** - საქართველოში ბუღალტრული აღრიცხვის საერთაშორისო სტანდარტებით კადრების გადამზადების სფეროში შეტანილი წვლილისათვის.

2. გამგეობის საქმიანობის მიმოხილვა

გამგეობის მიერ გაწეული საქმიანობა, პირობითად, შეიძლება ორ ნაწილად დავყოთ:

1. ბუღალტერთა საერთაშორისო ფედერაციასთან შეთანხმებული 2015-2016 წლების სამოქმედო გეგმით გათვალისწინებული ვალდებულებების შესრულება

წევრებისადმი ბუღალტერთა საერთაშორისო ფედერაციის მოთხოვნების შესაბამისად, ბაფი 2 წელიწადში ერთხელ ადგენს სამოქმედო (ორწლიან) გეგმას, რომელიც 7 ნაწილადაა დაყოფილი და მოიცავს ბაფის საქმიანობის ყველა მიმართულებას. სამოქმედო გეგმის მიხედვით განსაზღვრული ძირითადი პროექტების შესრულება ბაფის კომიტეტების ფუნქციებში შედის და საანგარიშგებო პერიოდში მათ საქმიანობას ქვემოთ მიმოვიხილავთ. სამოქმედო გეგმის შესრულებაზე ზედამხედველობას და პერიოდულ შეფასებას ახორციელებს ბუღალტერთა საერთაშორისო ფედერაცია, რომელმაც ბაფის 2016 წლის საქმიანობა დადებითად შეაფასა ერთი გამონაკლისით - დისციპლინარული მოკვლევის სფეროში იყო გარკვეული შენიშვნები. გამგეობის მიერ მოხდა შენიშვნების გათვალისწინება და შესაბამის კომიტეტს დაევალა განახლებული წესებით მოქმედება.

2. ბაფის მისიიდან გამომდინარე, ქვეყანაში ბუღალტრული აღრიცხვისა და აუდიტის საერთაშორისო პრაქტიკის დამკვიდრების ხელშეწყობა

„ევროკავშირის და ევროპის ატომური ენერჯის გაერთიანებასა და მათ წევრ სახელმწიფოებთან თანამშრომლობის შესახებ ასოციირების ხელშეკრულებით“ გათვალისწინებული აღრიცხვისა და აუდიტის მარეგულირებელი საკანონმდებლო ბაზის ევროდირექტივების მოთხოვნებთან შესაბამისობის უზრუნველყოფა საჭიროებს პროფესიული ორგანიზაციების, სახელმწიფო სტრუქტურებისა და საერთაშორისო დონორი ორგანიზაციების ერთობლივ ძალისხმევას. ამ მიმართულებით, საანგარიშგებო წლის პირველ ნახევარში, აღსანიშნავია:

ა. „აღმოსავლეთ პარტნიორობის ქვეყნებში აუდიტისა და ანგარიშგების გაუმჯობესების პროგრამის“ (STAREP) ფარგლებში მსოფლიო ბანკში შექმნილ ჯგუფთან (CFRR) გამგეობის თანამშრომლობა. პროგრამა პარტნიორ ქვეყნებში (სომხეთი, აზერბაიჯანი, ბელარუსი, საქართველო, მოლდოვა და უკრაინა) ფინანსური ანგარიშგების რეფორმის მხარდაჭერას, საკანონმდებლო მარეგულირებელი ბაზის გაუმჯობესებას და ფინანსური ანგარიშგებისა და

აუდიტის სფეროებში საუკეთესო საერთაშორისო პრაქტიკის დანერგვის ხელშეწყობას ითვალისწინებს. პროექტში, საანგარიშო წლის პირველ ნახევარში აქტიურად იყო ჩართული ჩვენი ორგანიზაცია და მონაწილეობა მივიღეთ სხვადასხვა კონფერენციაში (იხ. ქვემოთ), სადაც შესაძლებლობა გვქონდა გავცნობოდით პროფესიის რეგულირების სფეროში საუკეთესო საერთაშორისო პრაქტიკას.

ბ. ფინანსთა სამინისტროს უწყებათაშორისი სამუშაო ჯგუფთან თანამშრომლობა „ბუღალტრული აღრიცხვის, ფინანსური ანგარიშგებისა და აუდიტის შესახებ“ კანონის პროექტის მომზადების პროცესში.

2016 წლის აგვისტოდან ბაფის გამგეობა აქტიურად თანამშრომლობს ფინანსთა სამინისტროს ბუღალტრული აღრიცხვის, ფინანსური ანგარიშგებისა და აუდიტის ზედამხედველობის სამსახურთან. აღნიშნული სამსახურის საბჭოს შემადგენლობაში მოღვაწეობს ბაფის მიერ წარდგენილი 2 პირი: ბატონი რუსლან ხოროშვილი და ბატონი ივანე ჯელია (სათათბირო ხმის უფლებით).

საანგარიშო პერიოდში, საოქმო ჩანაწერების მიხედვით, ჩატარებულია გამგეობის 7 სხდომა (წესდება ითვალისწინებს მინიმუმ ოთხი სხდომის ჩატარებას წელიწადში). გამგეობის სხდომებზე მიღებული დადგენილებების ძირითადი ნაწილი შესრულებულია, ხოლო ზოგიერთი ზოგიერთი საკითხის შესრულება გადატანილია მომავალი წლისათვის.

3. კომიტეტების საქმიანობის მიმოხილვა

განათლებისა და სერტიფიცირების კომიტეტი.

ბუღალტერთა გადამზადება, პროფესიული სერტიფიცირება და უწყვეტი განგრძობითი განათლების ხელშეწყობა ბაფის საქმიანობის ძირითადი საქმიანობაა. ამ მიმართულებით ბაფი ხელს უწყობს პროფესიის განვითარებას ქვეყნისათვის მაღალკვალიფიციური პროფესიონალების მომზადებით, რომლებიც აკმაყოფილებენ პროფესიონალისათვის დამახასიათებელ საერთაშორისო კრიტერიუმებსა და ეთიკის ნორმებს.

2016 წელს ბაფში **დარეგისტრირდა 1025** პროფესიული სერტიფიცირების პრეტენდენტი, აქედან 981 ქართულენოვან და 44 ინგლისურენოვან პროგრამაში. 2016 წლის 30 დეკემბრის მონაცემებით, სასერტიფიკაციო პროცესში წიგნების მიხედვით დარეგისტრირებულია **7526 პრეტენდენტი**. საანგარიშო პერიოდში გამოცდაზე გამოვიდა 1385 და დადებითი შედეგი მიიღო 1157, ხოლო უარყოფითი 228 პრეტენდენტმა. შედეგების მიხედვით:

I- ეტაპის სერტიფიკატი მიიღო 235 პრეტენდენტმა;

II- დონის სერტიფიკატი მიიღო 34 პრეტენდენტმა;

III –დონის სერტიფიკატი მიიღო და პროფესიონალი ბუღალტრის სტატუსი მიენიჭა 16 პრეტენდენტს, რომლებიც შეემატნენ ბაფის ნამდვილი წევრების რიგებს.

2016 წლის ბოლოსათვის პროფესიული სერტიფიცირების პროგრამა სრულად დამთავრებული აქვს სულ 172 პირს, აქედან 129 პირმა დაამთავრა ACCA -ის ქართულენოვანი პროგრამა, ხოლო ACCA -ის ინგლისური პროგრამა -43-მა.

„პროფესიონალ ბუღალტრად“ განათლების კომიტეტის მიერ სულ აღიარებულია სხვა ქვეყნის პროფესიული ორგანიზაციის წევრი 27 „პროფესიონალი ბუღალტერი“, აქედან 10 საანგარიშგებო პერიოდში.

ბაფსა და ACCA-ს შორის თანამშრომლობის განახლებული მემორანდუმით, ACCA -იმ ბაფის ქართულენოვან პროგრამას აკრედიტაცია გაუგრძელა 2018 წლის ჩათვლით და ჩათვლის პირობები უფრო დაიხვეწა.

2016 წელს ACCA -ისა და ბაფს შორის განხორციელდა პროექტი, რომელიც გულისხმობდა ბაფის I, II და III ეტაპის სერტიფიკატების მქონე სტუდენტების ACCA-ში ჩარიცხვას, წიგნებში ჩათვლების გაცემას, ქართულ პროგრამაში ჩაბარებული წიგნების შესაბამისად და 2016 წლის წლიური გადასახადიდან განთავისუფლებას. ეს ყოველივე სტუდენტისათვის უფასოდ იყო შეთავაზებული. აღნიშნული პროექტის ფარგლებში ACCA-ში ჩაირიცხა - 62 სტუდენტი, რომლებმაც მიიღეს მინიმუმ - 3, ხოლო მაქსიმუმ - 9 წიგნის ჩათვლა.

ტრადიციულად, საანგარიშო პერიოდში ბაფი აგრეთვე ახორციელებდა მთავარი ბუღალტრის სერტიფიცირების პროგრამას. ამ პროგრამაში მონაწილეობა მიიღო 98 პრეტენდენტმა. გამოცდები წარმატებით ჩააბარა და მთავარი ბუღალტრის კვალიფიკაცია მიენიჭა 71 პრეტენდენტს.

უწყვეტი განგრძობითი განათლების სემინარებში მონაწილეობდა 324 ნამდვილი წევრი, ხოლო ჩათვლა მიეცა 95 წევრს.

სტანდარტებისა და პრაქტიკის კომიტეტი

ბაფის საქმიანობაში ერთ-ერთი მნიშვნელოვანი მიმართულებაა ბუღალტრული აღრიცხვისა და აუდიტის საერთაშორისო სტანდარტებისა და მათი გამოყენების სახელმძღვანელო ლიტერატურის თარგმნა. სამუშაოს სირთულისა და მოცულობის გამო, ეს პროცესი მოითხოვს ბაფის ინტელექტუალური და ფინანსური რესურსების მაქსიმალურ მობილიზებას. აღნიშნული ფაქტორების გათვალისწინებით, მნიშვნელოვანია, რომ 2016 წელს დასრულდა:

ა. პროფესიონალ ბუღალტერთა ეთიკის კოდექსის სახელმძღვანელოს თარგმნა და გამოცემა (2015 წლის რედაქციით);

ბ. აუდიტის საერთაშორისო სტანდარტების თარგმნა (2015 წლის რედაქციით);

გ. ბუღალტერთა საერთაშორისო ფედერაციის განათლების სტანდარტები (2016 წლის რედაქციით).

კომიტეტი ჩართული იყო ბაფის განგრძობითი სწავლების 2016 წლის თემატიკით გათვალისწინებული სემინარების პროგრამის მომზადებისა და ლექციების ჩატარების პროცესში.

საწევრო კომიტეტი

საწევრო კომიტეტი განიხილავს წევრობის კანდიდატების წარმოდგენილ დოკუმენტებს, იღებს გადაწყვეტილებებს მათ წევრად მიღებაზე, ატარებს ადმინისტრაციულ ღონისძიებებს წევრობის შეჩერებასა და გარიცხვაზე. კურირებს საწევრო გადასახადების დაფარვის პროცესს.

მიუხედავად იმისა, რომ საანგარიშგებო პერიოდში, წინა წლებთან შედარებით, გაუმჯობესებულია საწევრო გადასახადების აკრეფა, ამ კუთხით ვითარება მაინც არასახარბიელოა და ასოცირებულ წევრთა გარიცხვა, ძირითადად, გვიხდება საწევრო გადასახადის გადაუხდელობის გამო.

ფიზიკური პირი წევრების სტატისტიკა 2016 წელს:

გაირიცხა - 864 წევრი, მათ შორის 857 ასოცირებული და 7 ნამდვილი წევრი; მიღებულ იქნა - 730 ასოცირებული წევრი; ნამდვილი წევრი გახდა 16 პროფესიონალი ბუღალტერი.

2016 წლის დეკემბრის მდგომარეობით ბაფის წევრი იყო:

6771 ფიზიკური პირი, აქედან ნამდვილი წევრი- 421 (387 პროფესიონალი, 34 სერტიფიცირებული მთავარი ბუღალტერი) და ასოცირებული - 6350;

კორპორაციული წევრების სტატისტიკა:

გაირიცხა - 0; მიღებული იქნა 20 აუდიტური კომპანია და 5 ინდივიდუალური აუდიტორი;

2016 წლის 30 დეკემბრისათვის ბაფის კორპორაციული წევრი იყო 98 აუდიტური კომპანია და 33 ინდივიდუალური აუდიტორი.

აუდიტორული საქმიანობის რეგულირების კომიტეტი

კომიტეტმა 2016 წლამდე პერიოდში, საბოლოო სახემდე მიიყვანა ხარისხის კონტროლის სისტემის შემოწმებისათვის აუცილებელი დოკუმენტები: ხარისხის კონტროლის სისტემის შემოწმების სერტიფიცირების დებულება და ხარისხის კონტროლის სისტემის მონიტორინგის დებულება; მოახდინა ხარისხის კონტროლის სისტემის შემოწმებლების სერტიფიცირება და 2015 წლიდან ახდენდა კორპორაციული წევრების ხარისხის კონტროლის

სისტემის მონიტორინგს. სამოქმედო გეგმით, აუდიტის რეგულირების კომიტეტის მთავარი მიზანი საანგარიშგებო წელს იყო ბაფის წევრ აუდიტორულ კომპანიებში ხარისხის კონტროლის სისტემის მონიტორინგის ჩატარება. ვინაიდან საანგარიშგებო წელს მომზადებული და მთავრობის მიერ პარლამენტში ინიცირებული (შემდეგ მიღებული) იყო ბუღალტრული აღრიცხვისა და ფინანსური ანგარიშგების აუდიტის შესახებ საქართველოს კანონი, რომლის მიხედვითაც ხარისხის კონტროლის სისტემის შემოწმების ფუნქცია გათვალისწინებულია სახელმწიფო საზედამხედველო ორგანოს მიერ, პროცესი შეფერხდა. კომიტეტი, ძირითადად, გადაერთო კორპორაციული წევრებისათვის ხარისხის კონტროლის სისტემის სრულყოფისათვის კონსულტაციებისა და სემინარების ფორმით მხარდაჭერაზე. ბაფი ხარისხის კონტროლის სისტემის წინასწარ მონიტორინგს განახორციელებს მხოლოდ იმ წევრ კომპანიებში, რომლებიც ამის სურვილს გამოხატავენ.

კომიტეტის საქმიანობის ფარგლებში 2016 წელს: ა. შერჩეულ იქნა აუდიტის პროგრამა, რომელიც ითარგმნა ქართულ ენაზე და ხელმისაწვდომი გახდა აუდიტური კომპანიებისათვის; ბ. უცხოელ ექსპერტებთან (ესტონეთი) შესაბამისი კონტრაქტის საფუძველზე, ჩატარდა 40-საათიანი პრაქტიკული სემინარი ხარისხის კონტროლის სისტემის მეთოდოლოგაზე; გ. გაიმართა შეხვედრები (მრგვალი მაგიდა) თემაზე: „მომსახურების ხარისხის კონტროლის სისტემის მონიტორინგისათვის მოსამზადებელი სამუშაოები“.

საგადასახადო დაბეგვრის კომიტეტი

საგადასახადო კომიტეტის დებულებით, მისი ფუნქციაა: ბაფის წევრების საკონსულტაციო მომსახურება საგადასახადო დაბეგვრის, ბუღალტრული აღრიცხვისა და აუდიტის საკითხებზე; ბაფში წერილობით შემოსულ კითხვებზე კონსულტანტის მიერ მომზადებული პასუხების პროექტის განხილვა და საბოლოო პასუხის მომზადება მისი ჟურნალში გამოქვეყნებამდე (ან კითხვის ავტორთან გაგზავნამდე); საგადასახადო კოდექსთან დაკავშირებით გამართულ დისკუსიებში მონაწილეობა სამთავრობო და საკანონმდებლო სტრუქტურებთან, ბაფის სახელით. კომიტეტი, როგორც გასულ წლებში, საანგარიშო პერიოდშიც წარმატებით ასრულებდა თავის ფუნქციებს.

ეთიკისა და დისციპლინარული კომიტეტი

„ბუღალტრული აღრიცხვის, ანგარიშგებისა და აუდიტის შესახებ“ საქართველოს ახალი კანონისა (08. 06.2016) და ბუღალტერთა საერთაშორისო ფედერაციის მიერ შემუშავებული შესაბამისი რეგულაციების საფუძველზე, საანგარიშგებო წელს განახლდა „ბაფის წევრების მიერ პროფესიონალი ბუღალტრების ეთიკის კოდექსისა (IESBA Code) და ხარისხის კონტროლის სისტემის მიმართ დადგენილი მოთხოვნების დარღვევის გამოვლენისა და დისციპლინური პასუხისმგებლობის დაკისრების წესი“. მიღებული წესით განისაზღვრა:

- ა) პროფესიონალი ბუღალტრების ეთიკის კოდექსისა და ხარისხის კონტროლის სისტემის მიმართ დადგენილი მოთხოვნების დარღვევის გამოვლენის მიდგომები;
- ბ) გამოვლენილ დარღვევებზე დისციპლინარული პასუხისმგებლობის ზომა და მათი დაკისრების წესი.

4. აღმასრულებელი სტრუქტურის საქმიანობის მიმოხილვა

აღმასრულებელი სტრუქტურის საქმიანობა რეგულირებულია შიდა ნორმატიული დოკუმენტებით, კერძოდ, გაწერილი და დამტკიცებულია "მენეჯერული პროცედურები"; თანამშრომელთა საქმიანობა რეგულირდება აღმასრულებელი დირექტორის მიერ დამტკიცებული ბრძანებით "ბაფის თანამშრომელთა ფუნქციების შესახებ". დოკუმენტში გაწერილია თითოეული თანამშრომლის უფლება-მოვალეობები, უზრუნველყოფილია ორგანიზაციის ადმინისტრაციის წევრების ვალდებულებების მკაფიოდ ჩამოყალიბება და გამიჯვნა, რაც საშუალებას იძლევა დაცული იყოს თითოეულ უბანზე პასუხისმგებლობის შესაფერი დონე. თანამშრომელთა ვალდებულებების შესრულება კონტროლდება ოფისის მენეჯერისა და აღმასრულებელი დირექტორის მიერ.

საანგარიშო პერიოდში განახლებულია ბაფის ვებგვერდის სტრუქტურა და დიზაინი. ახალი ვებგვერდის შექმნით გადაწყვეტილია გასული წლების პრობლემა ინგლისურენოვანი საიტის შექმნასთან დაკავშირებით. თარგმნის პროგრამის რეჟიმში ავტომატურად უზრუნველყოფს საიტზე განთავსებული ინფორმაციის თარგმნას რუსულ და ინგლისურ ენებზე.

5. ეკონომიკური და ფინანსური საქმიანობა

საანგარიშგებო პერიოდის ეკონომიკური და ფინანსური საქმიანობა, მუხლობრივად და თანხობრივ პარამეტრებში, მოცემულია გამგეობის მიერ დამტკიცებული 2016 წლის ბიუჯეტში, რომელიც გამოქვეყნებულია და მისი გაცნობა შესაძლებელია ვებგვერდზე: **baf.ge** – „საქმიანობის ანგარიშები“.

2016 წლის ფინანსური ანგარიშგება, დამოუკიდებელი აუდიტორის დასკვნასთან ერთად, გამოქვეყნდება 2017 წლის 1 მაისამდე ვებგვერდზე: **baf.ge** – „საქმიანობის ანგარიშები“, სადაც შესაძლებელია აგრეთვე ბოლო ხუთი წლის ფინანსური ანგარიშგებების გაცნობა.

ზემოაღნიშნულიდან გამომდინარე, წარმოდგენილ საქმიანობის ანგარიშში, ეკონომიკურ და ფინანსურ საქმიანობას დეტალურად არ მიმოვიხილავთ. მოკლედ აღვნიშნავთ, რომ გასული წლების ფინანსური ანგარიშგების ანალიზის მიხედვით, ბაფს დამაკმაყოფილებელი ფინანსური მდგომარეობა აქვს. ბაფის ფინანსური მდგომარეობის გარანტია წმინდა აქტივების ღირებულება და ლიკვიდობის მაღალი დონეა.

6. საერთაშორისო კონფერენციები

ბაფის მიღწევები და საერთაშორისო აღიარება მნიშვნელოვნადაა განპირობებული სამეცნიერო-პრაქტიკულ კონფერენციებში მიღებული გამოცდილების გაზიარებითა და პრაქტიკაში დანერგვით. ბაფის წარმომადგენლები ყოველწლიურად მონაწილეობენ პროფესიის განვითარების თემებზე ჩატარებულ საერთაშორისო კონფერენციებში. გარდა ამისა, ბაფის ინიციატივითა და ორგანიზებით საქართველოში სხვადასხვა პერიოდში ჩატარდა 12 საერთაშორისო კონფერენცია.

2016 წლის 20-21 მაისს - საქართველოს პროფესიონალ ბუღალტერთა და აუდიტორთა ფედერაციამ უმასპინძლა **საერთაშორისო კონფერენციას** თემაზე: „პროფესიული განვითარების 20 წელი - ევროინტეგრაცია და პროფესიის გამოწვევები“. კონფერენციის უმთავრესი მიზანი იყო სახელმწიფო სტრუქტურებისა (პარლამენტი, მთავრობა) და ბუღალტრული აღრიცხვისა და აუდიტის სფეროს წარმომადგენლებს საშუალება ჰქონოდათ, უკეთ გაეცნობოდნენ საერთაშორისო პრაქტიკას, რაც საქართველოს დაეხმარება პროფესიის მარეგულირებელი სრულყოფილი და ევროდირექტივებთან შესაბამისი საკანონმდებლო ბაზის ფორმირებაში. კონფერენციის მონაწილეებს შესაძლებლობა მიეცათ, აქტიურად ემსჯელათ საქართველოს მთავრობის მიერ პარლამენტში ინიცირებული „ბუღალტრული აღრიცხვისა და ფინანსური ანგარიშგების აუდიტის შესახებ“ კანონ-პროექტის ძირითად დებულებებზე და გაემართათ დისკუსია.

კონფერენციაში მონაწილეობენ: **ენტონ ჰარბინსონი** - ბრიტანეთის სერტიფიცირებულ ნაფიც ბუღალტერთა ასოციაცია (ACCA); **ტაკაცუგუ ოჩი** - ფინანსური ანგარიშგების საერთაშორისო სტანდარტების ფონდი; **ნატალი მანულოვა** - მსოფლიო ბანკი, ფინანსური მართვის უფროსი სპეციალისტი; **ჰორია ნემტუ** - რუმინეთის ფინანსურ აუდიტორთა პალატა; **დიმიტრი იაკოვენკო** - პროფესიონალი ბუღალტრების, ფინანსური მენეჯერებისა და ეკონომისტების სამარის ეროვნული ინსტიტუტი; **ვაჰიდ ნავრუზოვი** - აზერბაიჯანის აუდიტორთა პალატა; **მარტ-მარტინ არენგუ** - ესტონეთის აუდიტორთა ასოციაცია; **დავიდ გოლდბერგი** - ისრაელის სერტიფიცირებულ ბუღალტერთა ინსტიტუტი; **საფარ კომპიმბაევი** - ყაზახეთის აუდიტორთა პალატა; **რადოსლავ იგნატოვსკი** - პოლონეთის ბუღალტერთა ასოციაცია; **ნატალია ლოგკა** - უკრაინის პროფესიონალ ბუღალტერთა და აუდიტორთა ფედერაცია. საქართველოს მთავრობის, არასამთავრობო სექტორის, წევრი კომპანიებისა და აკადემიური სფეროს წარმომადგენლები.

თემები და მომხსენებლები:

თემა: ევროკავშირთან ასოცირების ხელშეკრულების მოთხოვნები და პროფესიის მარეგულირებელი საკანონმდებლო ბაზა საქართველოში, მოხსენებით გამოვიდნენ:

ნოდარ ებანოძე - პარლამენტის საფინანსო-საბიუჯეტო კომიტეტის თავმჯდომარის მოადგილე; **იური დილიძე** - *ფინანსთა სამინისტროს შემოსავლების სამსახურის უფროსის მრჩეველი*; **ჯონ ჰუპერი** - მსოფლიო ბანკის ფინანსური მართვის კონსულტანტი.

თემა: პროფესიული განათლებისა და სერტიფიცირების გლობალური ტენდენციები - **ანტონ ჰარბინსონი**, ბრიტანეთის სერტიფიცირებულ ნაფიც ბუღალტერთა ასოციაცია (ACCA) პრეზიდენტი;

თემა: საერთაშორისო სტანდარტების სახელმწიფო (ეროვნულ) ენაზე ხელმისაწვდომობის მნიშვნელობა ფინანსური ანგარიშგების შესაბამისობისა და ხარისხის უზრუნველყოფაში - **ტაკაცუგუ ოჩი**, ფინანსური ანგარიშგების საერთაშორისო სტანდარტების ფონდის საბჭოს წევრი;

თემა: თანამედროვე გამოწვევები მცირე და საშუალო ზომის აუდიტის ბაზარსა და ასოციაციებში - **მარტ-მარტინ არენგუ**, ესტონეთის აუდიტორთა ასოციაციის პრეზიდენტი.

თემა: პროფესიული ორგანიზაციების როლი პროფესიის განვითარებისა და რეგულირების სფეროში - **ჯონ ჰოჯი** - მსოფლიო ბანკი, ფინანსური მართვის უფროსი სპეციალისტი; **გიორგი რუსიაშვილი**, ბუღალტერთა, აუდიტორთა და კონსულტანტთა საზოგადოება, პრეზიდენტი; **ლავრენტი ჭუმბურიძე**, საქართველოს პროფესიონალ ბუღალტერთა და აუდიტორთა ფედერაცია, გამგეობის წევრი.

კონფერენციის ბოლო ნაწილი დაეთმო თემის ირგვლივ დისკუსიასა და მის შეჯამებას.

20 წლის იუბილესთან დაკავშირებული საზეიმო მიღება

საზეიმო ღონისძიებაზე მოწვეული იყო 500-ზე მეტი სტუმარი, მათ შორის - საქართველოს მთავრობის, პარლამენტის, ქ. თბილისის მერიისა და საკრებულოს, აკადემიური და ბიზნეს სექტორის, ბაფის პარტნიორი ადგილობრივი და საერთაშორისო ორგანიზაციების წარმომადგენლები და ბაფის წევრები.

ბაფს 20 წლის იუბილე მიულოცა ბუღალტერთა საერთაშორისო ფედერაციის პრეზიდენტმა **(IFAC) ოლივია ფ. ქირთლიმ**.

საზეიმო საღამოში მონაწილეობდნენ, სტუმრებს მიესალმნენ და ბაფის საქმიანობის შესახებ ისაუბრეს:

გიორგი ქუმსიშილი - საქართველოს ვიცე-პრემიერი, ეკონომიკისა და მდგრადი განვითარების მინისტრი; **ნოდარ ხადურმა** - საქართველოს ფინანსთა მინისტრი; **დავით ნარმანიამ** - ქ. თბილისის მერი.

საზეიმო ღონისძიებაზე მრავალწლიანი თანამშრომლობისა და პარტნიორობისათვის ბაფმა სამადლობელი სიგელებით დააჯილდოვა:

ოლივია ფ. ქირთლი ბუღალტერთა საერთაშორისო ფედერაციის პრეზიდენტი; **ენტონ ჰარბინსონი**- ბრიტანეთის სერტიფიცირებულ ნაფიც ბუღალტერთა ასოციაციის (ACCA) წინა პერიოდის პრეზიდენტი; **ტაკაცუგუ ოჩი** - ფინანსური ანგარიშგების საერთაშორისო სტანდარტების ფონდის წევრი; **ნატალია მანულოვა** - მსოფლიო ბანკი, ფინანსური მართვის უფროსი სპეციალისტი.

20 წლის იუბილესთან დაკავშირებით ბაფმა მრავალი წერილობითი მილოცვა და საჩუქარი მიიღო პარტნიორი საერთაშორისო ორგანიზაციებიდან, პროფესიის წარმომადგენლებისაგან მსოფლიოს სხვადასხვა ქვეყნიდან, საქართველოს ბიზნეს და აკადემიური სექტორიდან. წერილობითი მილოცვის ტექსტები გამოიცა საიუბილეო ბროშურის სახით.

საანგარიშო პერიოდში ბაფმა აგრეთვე მონაწილეობა მიიღო:

1. აზერბაიჯანის დედაქალაქ ბაქოში ჩატარებულ (5-6 აპრილი) საერთაშორისო კონფერენციაში თემაზე: „აუდიტის რეგულირების აქტუალური პრობლემები თანამედროვე ეტაპზე“ (ლავრენტი ჭუმბურიძე, კონსტანტინე დათიაშვილი);
2. ბელორუსიის დედაქალაქ მინსკში, მსოფლიო ბანკის ფინანსური ანგარიშგების რეფორმის ცენტრის (CFRR) ხელმძღვანელობით ჩატარებულ საერთაშორისო კონფერენციაში, რომლის თემა იყო: „ბუღალტრული აღრიცხვის სწავლების ეროვნული ინიციატივები“ (რევაზ ძამამია);
3. ლიტვის აუდიტორთა პალატის 20 წლის იუბილესადმი მიძღვნილ კონფერენციაში თემაზე: „ მიღწევები, მიმდინარე საკითხები და მომავლის პერსპექტივები“ (ზურაბ ლალაზაშვილი).

ლ. ჭუმბურიძე,

ბაფის აღმასრულებელი დირექტორი